

ZIGOR ARAUBIDEA: ARAU-HAUSTEAK ETA ZIGORRAK

101. artikulua.—Lege-araubidea eta organo eskuduna

Araudi honetan ezarritakoa urratzeagatik sortzen den erantzukizuna Herri Administrazioen Araubide Juridikoaren eta Administrazio Prozedura Erkidearen 30/1992 Legean ezarritakoak, garapen-araudiak eta Euskal Autonomia Erkidegoko Administrazio Publikoen Zigor Ahalmenari buruzko otsailaren 20ko 2/1998 Legeak zuzenduko dute.

Orozkoko Udaleko Alkate-udalburua edo horrek eskuordetzen duena izango da araudi honetan aurreikusitako arau-hausteak egiteagatik zigor espedienteei hasiera eman eta horiek ebazteko organo eskuduna. Hori guztia ez da eragozpen izango indarrean dagoen legediak une bakoitzean ematen dituen eskumenetarako.

102. artikulua.—Araudi hau betetzeko betebeharra

Erabiltzaileek araudi honetan jasotako betebeharrak guztiak bete beharko dituzte, izan ere betetzen ez badute horrek dagokion zigorra ekarriko du, behean aipatzen direnez gain.

103. artikulua.—Instalazioen arduradunen eskumenak

Instalazioetako arduradunek behar den jarrera ez duten pertsonak ohartarazteko eta instalazioetatik kanporatzeko eskumena dute.

104. artikulua.—Arau-hausteen sailkapena

Arau-hausteak larriak edo arinak izango dira, behean zehazten den moduan:

A) Arau-hauste larriak:

1. Instalazioak, ekipamenduak, kirol materiala edo erabiltzaile edo ikusleen objektuak lapurtzea edo nahita hondatzea.
2. Kirol esparruaren barruan liskarrak, iskanbila edo eraso fisikoak sortzea edo horietan parte hartzea.
3. Igerilekuko ura nahita zikintza, edo igerileku barrura edozein motatako objektua botatzea.
4. Instalazioko arduraduna eta langileak fisikoki edo hitzez erasotzea.
5. Zerbitzu eta instalazioen jardunbide onerako arduradunek ezartzen dituzten zehaztapenei behin eta berriz huts egitea.
6. Hiru hilabeteko epean hiru arau-hauste ezberdin egitea.

B) Arau-hauste arinak:

1. Instalazioetan edari alkoholduak edota tabakoa kontsumitzea, horretarako berariaz ezarritako guneetan izan ezik.
2. Kirola egitera bideratutako tokietan, igerilekuaren gunean, hondartza-gunean eta berariaz debekatuta dagoen guneetan edariak edota jakiak kontsumitzea.
3. Instalazioetan edozein motatako animaliak edo debekatutako objektuak sartzea.

4. Instalazio bakoitzaren berariazko erabilera-arauak urratzea.
5. Kirola egiteko gunean eta eranskinetan janaria edo edaria, latak, beirazko ontziak etab. sartzea.
6. Berariaz beste sexuarentzat diren esparruetan sartzea.
7. Esparruetan beren xede ez diren joko edo kirolean aritzea, jardunbide onari kalte eginez kantuen bitartez edo gainerako erabiltzaileen, publikoaren etab.en begiruneari huts eginez.
8. Instalazioak edo kirol ekipamenduan listua botatzea, zikintzea edo gaizki tratatzea.
9. Berariaz kirola egitera bideratutako guneetan kirol ekipoa ez erabiltzea.
10. Txartela txartelaren titular ez den pertsonak erabiltzea.
11. Arautegi honetan ezarritako gainerako debeku, muga edo betebeharrak ez betetzea.

Arau-hauste horiek erantzukizuna alda dezaketen inguruabar larriak, aringarri edo salbuesleak kontuan hartuta baloratuko da, dagozkion ekintza judizialak egiteko eragozpen izan gabe, aurretik aipatutako ekintzetan Orozkoko Udalak erantzukizun penalak edo zibilak antzematen baditu.

105. artikulua.—Zigorrak

Arau-haustea osatzen duten ekintzak artikulua honetan ezarritako moduan zigortuko dira.

a) Arau-hauste larrien ondorioz dagokion zigorra ezarri ahal izango da: gehienez ere 6 hilabeterako instalazioetatik kanporatzea eta zigorrak dirauen epean harpidedun eta erabiltzaile gisa dituen eskubide guztiak galtzea, edota 1.500 euro bitarteko isuna ezartzea, gertakarien larritasun handiagoaren edo txikiagoaren arabera.

Arau-hauste eta zigor larriak 2 urtera preskribituko dira.

b) Arau-hauste arinen ondorioz dagokion zigorra ezarri ahal izango da: ohartarazpena eta demanda publiko edo pribatua, edota gehienez ere 30 egunetarako kanporatzea eta harpidedun txartela kentzea epe horretarako, edota 750 euro bitarteko isuna jartzea, gertakariaren larritasun handiagoaren edo txikiagoaren arabera.

Arau-hauste arinak sei hilabeteko epean preskribatzen dira, eta zigor arinen preskripzio-epea urtebetekoa da.